

VENDIM
Nr. 851, datë 26.12.2013

PËR DHËNIEN E MANDATIT TË DEPUTETIT TË KUVENDIT, KANDIDATIT TË LISTËS SHUMEMËRORE TË PARTISË SOCIALISTE NË QARKUN TIRANË, PËR PLOTËSIMIN E VAKANCËS SË NJOFTUAR NGA KUVENDI I SHQIPËRISË

Komisioni Qendror i Zgjedhjeve, në mbledhjen e datës 26.12.2013, me pjesëmarrjen e:

Leterije Luzi (Lleshi)	kryetare
Hysen Osmanaj	anëtar
Klement Zguri	anëtar
Vera Shtjefni	anëtare,

shqyrtoi çështjen me:

OBJEKT: Për dhënien e mandatit të deputetit të Kuvendit, kandidatit të listës shumemërore të Partisë Socialiste, në qarkun e Tiranës, për plotësimin e vakancës së njoftuar nga Kuvendi i Shqipërisë, pas heqjes dorë nga mandati i deputetit të znj. Lindita Nikolla.

KËRKUES: Kuvendi i Republikës së Shqipërisë.

BAZA LIGJORE: Neni 23, pika 1, germa “a”, neni 175, pika 2, i ligjit nr. 10 019, datë 29.12.2008 “Kodi Zgjedhor i Republikës së Shqipërisë”, i ndryshuar.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr. 7374 prot., datë 24.12.2013, drejtuar KQZ-së, sekretari i përgjithshëm i Kuvendit, znj. Albana Shtylla, njofton krijimin e vakancës për shkak të heqjes dorë nga mandati i deputetit të Kuvendit të Shqipërisë të znj. Lindita Nikolla, deputete e zonës zgjedhore, qarku Tiranë.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatit, kandidatit të radhës në listën shumemërore të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Kolegji Zgjedhor me vendimin nr.36, datë 2.8.2013, ka shpërndarë mandatet dhe ka përcaktuar kandidatët fitues për zonën zgjedhore, qarku Tiranë, në zgjedhjet për Kuvendin të vitit 2013". Sipas vendimit të sipërcituar, Partia Socialiste për zonën zgjedhore, Qarku Tiranë, për zgjedhjet për Kuvendin e Shqipërisë të datës 23 Qershor 2013, ka fituar 16 mandate dhe kandidatët fitues nga lista shumemërore e Partisë Socialiste për qarkun e Tiranës, janë si më poshtë: me numër rendor 1 (një) Pandeli Majko, me numër rendor 2 (dy) Saimir Tahiri, me numër rendor 3 (tre) Vasilika Hysi, me numër rendor 4 (katër) Ditmir Bushati, me numër rendor 5 (pesë) Fatmir Xhafaj, me numër rendor 6 (gjashtë) Lindita Nikolla, me numër rendor 7 (shtatë) Besnik Baraj, me numër rendor 8 (tetë) Xhemal Qefalia, me numër rendor 9 (nëntë) Sadri Abazi, me numër rendor 10 (dhjetë) Parid Cara, me numër rendor 11 (njëmbëdhjetë) Spartak Braho, me numër rendor 12 (dymbëdhjetë) Artan Gaçi, me numër rendor 13 (trembëdhjetë) Pjerin Ndreu, me numër rendor 14 (katërmëdhjetë) Rakip Suli, me numër rendor 15 (pesëmbëdhjetë) Milena Harito, me numër rendor 16 (gjashtëmbëdhjetë) Dashamir Peza. Pas dorëheqjes nga mandati i deputetes të zj. Milena Harito, KQZ me vendimin nr.843, datë 18.12.2013 “Për dhënien e mandatit të deputetit të Kuvendit kandidatit të radhës të listës shumemërore të Partisë Socialiste në Qarkun Tiranë, për plotësimin e vakancës së njoftuar nga Kuvendi i Shqipërisë”, vendosi t’i japë mandatin e deputetit të Kuvendit të Republikës së Shqipërisë, kandidatit të radhës në listën shumemërore të Partisë Socialiste, qarku Tiranë, znj. Enkelejda Hamit Shkreli. Znj. Enkelejda Shkreli është me numër rendor 17 në listën shumemërore të PS në zonën zgjedhore qarku Tiranë.

Rezulton se lista shumemërore e Partisë Socialiste në qarkun Tiranë nuk plotëson të gjitha kriteret e përcaktuara në nenin 67 të Kodit Zgjedhor, dhe konkretisht nuk plotëson kriterin e gjinisë, duke mos pasur 30% nga secila gjini në listën shumemërore. KQZ-ja me vendimin nr. 337, datë 11.5.2013 vendosi sanksionin administrativ gjorbë, në masën 6 milionë lekë ndaj Partisë Socialiste. Në bazë të nenit 175, pika 2 të Kodit Zgjedhor, KQZ-ja në rast vakance të krijuar në mandatet e fituara nga lista shumemërore e PS-së në zonën

zgjedhore, qarku Tiranë, duhet të zbatojë dhe sanksionin plotësues, duke zëvendësuar vakancën e krijuar me kandidatin e radhës nga gjinia më pak e përfaqësuar deri në plotësimin e kuotës gjinore.

Sipas dispozitave të sipërcituara, në çdo rast rezulton se vakanca e krijuar nga heqja dorë nga mandati i deputetes, znj. Lindita Nikolla, do të zëvendësohet nga kandidatja e parë e gjinisë më pak të përfaqësuar, e cila renditet pas znj. Enkelejda Shkrelit në listën shumemërore të Partisë Socialiste në qarkun Tiranë.

KQZ-ja, me vendimin nr. 337, datë 11.05.2013 “Për miratimin e listave shumemërore të Partisë Socialiste, pjesëtare e koalicionit “Aleanca për Shqipërinë Europiane” për zgjedhjet për Kuvendin e Shqipërisë 2013”, ka miratuar listën shumemërore të Partisë Socialiste për 12 zonat zgjedhore, së bashku me deklaratat model 03, për vendet sipas kuotës gjinore të listës shumemërore për çdo zonë zgjedhore.

Sipas deklaratës model 03 “Deklarim për vendet sipas kuotës gjinore të listës shumemërore”, të depozituar nga PS-ja në dokumentacionin e listës shumemërore të zonës zgjedhore, qarku Tiranë, rezulton se kandidatja e radhës, sipas deklaramentit, është kandidatja me nr. rendor 22 (njëzetë e dy), znj. Blerina Gjylameti.

Për sa më sipër, mandati i ndërprerë i përket kandidates me numër rendor 22 (njëzetë e dy), znj. Blerina Gjylameti, të listës së Partisë Socialiste në zonën zgjedhore, qarku Tiranë.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a” dhe neni 175, pika 2 të ligjit nr. 10 019, datë 29.12.2008 “Kodi Zgjedhor i Republikës së Shqipërisë”, të ndryshuar,

VENDOSI:

T’i japë mandatin e deputetit të Kuvendit të Republikës së Shqipërisë, kandidatit të radhës në listën shumemërore të Partisë Socialiste, qarku Tiranë, znj. Blerina Guri Gjylameti.

Ky vendim hyn në fuqi menjëherë dhe botohet në Fletoren Zyrtare.

Kundër këtij vendimi mund të bëhet ankim në Kolegjin Zgjedhor pranë Gjykatës së Apelit Tiranë, brenda 30 (tridhjetë) ditëve nga shpallja e këtij vendimi.